

Recordatorio de deberes legais dirixido ao Concello da Pobra do Brollón para que de conformidade co disposto na normativa de réxime local e de procedemento administrativo conteste expresamente o escrito presentado polo promotor deste expediente de queixa, se non o tivera feito na data en que reciba esta resolución e en xeral, no seu caso, sobre os escritos presentados pola cidadanía

Expediente: C.8.Q/205/24

Santiago de Compostela, 4 de abril de 2024

Sr. alcalde:

Nesta institución iniciouse expediente de queixa como consecuencia do escrito de XXX, referente a falta de resposta do Concello da Pobra do Brollón sobre medidas en materia de control de colonias felinas.

ANTECEDENTES

PRIMEIRO: En data do 15.01.2024 o promotor deste expediente formulou queixa ante a Valedora do Pobo, na que se indica na súa literalidade que:

“Buenas tardes,

Como el ayuntamiento de Puebla de Brollón no da respuesta a nuestro registro efectuado el 03/09/2023 20:44:38, y con número: REGAGE23e00058644025. Solicitamos la colaboración del Valedor do Pobo”

O promotor da queixa aporta copia do escrito presentado ante ese concello en data 03/09/2023, (RE núm.: REGAGE23e00058644025)”

SEGUNDO.- A queixa foi admitida a trámite promovendo, dende esta institución, unha investigación sumaria e informal para o esclarecemento dos supostos en que se baseaba, requirindo o preceptivo informe ao Concello de Pobra do Brollón con data do 19.01.2024 (R.S. 1350/24).

TERCEIRO.- Con data do 26.02.2024 (R.E. 2170/24), logo dos requirimentos efectuados recíbese nesta institución un informe remitido polo ente local no que se fai constar literalmente o seguinte:

“En relación cos escritos presentados por D. XXX, en calidade de representante da Asociación XXX e os remitidos polo Valedor do Pobo sobre este asunto INFORMO:

Que o Concello da Pobra do Brollón conta cunha poboación de 1.600 habitantes nunha extensión de 176,71 km², cun total de 22 parroquias e cento oito entidades de poboación. Ao tratarse dun Concello destas dimensións é totalmente rural xa que a mesma capital do concello a poboación non acada os 200 habitantes. Por esta mesma ruralidade carece de medios tanto materiais como persoais para o control das colonias felinas establecido na Lei 4/2017, do 03 de outubro, de protección e benestar dos animais de compañía en Galicia.

O Concello valorou e estudou a Orde DSA/1352/2022, de 22 de decembro pala que se establecen as bases reguladoras para a concesión de subvencións a entidades locais destinadas a mellorar e impulsar o control poboación de colonias felinas, constatando a inviabilidade da súa aplicación polos motivos sinalados anteriormente. En canto se convoque unha nova liña de achegas, valorarase de novo a situación.

Polo que solicito se teña por presentado o informe solicitado por esa Institución.”

ANÁLISE

Á vista do contido do escrito de queixa, da documentación achegada pola persoa que promoveu este expediente e do que se manifesta no informe da Administración, é preciso facer as seguintes consideracións:

Primeira: O promotor deste expediente queixase de que presentou un escrito no rexistro dese concello o 3 de setembro do 2023, e o 15 de xaneiro do 2024 cando acode á institución aínda non recibira resposta.

Segunda: O artigo 103 da *Constitución Española* sinala que *a Administración Pública serve con obxectividade os intereses xerais e actúa de acordo cos principios de eficacia, xerarquía, descentralización, desconcentración e coordinación, con sometemento pleno á lei e ao dereito*. Así, o marco xurídico vixente configura un sistema de garantías da cidadanía na súa relación coa Administración que descansa sobre mecanismos de participación, cuxa finalidade responde a facer compatible a actuación eficaz da Administración co exercicio destes dereitos.

O artigo 53 da *Lei 39/2015, do 1 de outubro, do Procedemento Administrativo Común das Administracións Públicas* regula os *“Dereitos da persoa interesada no procedemento administrativo”*, entre eles: *a) A coñecer, en calquera momento, o estado da tramitación dos procedementos nos que teñan a condición de interesados (...)*.

En calquera caso a Administración está obrigada a responder á cidadanía que acude a ela debendo ofrecerlle unha resposta por escrito que ademais sexa unha resposta directa, rápida, exacta e legal, fundada en tempo e forma adecuada ao procedemento que corresponda e congruente coas pretensións expresadas, todo elo con prontitude e sen demoras inxustificadas.

Terceira: Así mesmo, convén lembrar que o artigo 20 da Lei 6/1984, do 5 de xuño, do Valedor do Pobo, dispón que: O Valedor do Pobo *“velará porque a Administración resolva expresamente, as peticións e recursos que lle foron formulados”*.

No presente expediente, a falta de resposta da administración local ao escrito presentado pola Asociación XXX o 3 de setembro do 2023 no rexistro dese concello, propiciou que transcorrido un amplo período de tempo, o 15 de xaneiro do 2024 se dirixiran á institución da Valedora do Pobo formulando queixa e solicitando a súa intervención.

CONCLUSIÓN

Por todo o anterior, considérase necesario, en aplicación do disposto no artigo 32.1 da Lei 6/1984, do 5 de xuño, do Valedor do Pobo, facer chegar a ese Concello da Pobra do Brollón o seguinte ***recordatorio de deberes legais***:

“Recordámoslle que de conformidade co disposto na normativa de réxime local e de procedemento administrativo o Concello da Pobra do Brollón debe contestar expresamente o escrito presentado polo promotor deste expediente de queixa, se non o tivera feito na data en que reciba esta resolución e en xeral, no seu caso, sobre os escritos presentados pola cidadanía”.

Agradézolle de antemán a acollida ao manifestado nesta resolución da Valedora do Pobo, e recórdolle a necesidade de que no prazo dun mes (art. 32.2), dea conta a esta Institución da aceptación da resolución formulada, de ser o caso, e das medidas adoptadas para darlle efectividade, tamén se é o caso.

Ademais, facémoslle saber que, en aplicación do principio de transparencia, a partir da semana seguinte á data na que se ditou a presente resolución, esta se incluírá na páxina web da institución.

O principio de publicidade das resolucións desta institución refórzase no artigo 37 da Lei 6/1984, cando prevé que a Valedora do Pobo, no seu informe anual ao Parlamento de Galicia, dará conta do número e tipos de queixa presentadas; daquelas que foron rexeitadas e as súas causas, así como das que foron obxecto de investigación e o seu resultado, con especificación das suxestións ou recomendacións admitidas pola administración pública galega.

Saúdoo atentamente.

María Dolores Fernández Galiño
Valedora do Pobo